

Seruire & à la Passion, quoy qu'il n'y entédit rien; apres le difner il se vint confesser, & apres sa confession il fut encor vne heure & demie à la chappelle, il n'auoit mägé pendât le Carefme qu'un peu de galette, & vn peu d'huile de loup-marin, qu'il auoit expreffement conferuée pour ce temps-là: s'estant confessé & communié, il s'en retourna à la chaffe; le temps luy estant encor fauorable, il fit bonne prouision de chair d'Eslan, mais ayant donné charge à ses gens de l'aller requerir avec sa chaloupe, & les vents estans contraires, il fut long-temps comme prisonnier dans ces grands bois, sans nous pouuoir venir voir; à son retour il nous tira quasi les larmes des yeux, nous racontant comme il se comportoit dans ce petit bannissement.

[62] Je difois à Dieu, faisoit-il, toy qui commandes aux vents, arreste-les, afin que ie puisse aller en ta Maison, ie m'ennuie d'estre si long-temps sans me confesser, & sans voir la Maison de priere. Quand il faisoit quelque chose qu'il pensoit estre peché, aussitost il se mettoit à genoux, en demandoit à Dieu pardon, & se fraploit foy-mesme, pour tirer vengeance de ce qu'il pensoit estre faute, & qui bien souuent ne l'estoit pas, prenant la crainte du peché pour le peché mesme.

Sa petite fille estant tombée malade, en forte qu'il pensoit qu'elle en deust mourir; sa femme ne manqua pas de luy reprocher que le baptesme la faisoit mourir; ce bon homme mettant son esperance en Dieu, prend son chappelet, luy pend au col, & la presente à Dieu avec ces paroles; cét enfant est à toy, tu me l'as donnée, & ie te l'ay renduë, determine de sa vie comme tu voudras, tu en es le maistre; si